

# Ino Mekadwa A Turakki Pablo Sino Tesalonicera

## Ino Mapeafu Sitawa Turak

Massiki inappeno nanguruwira sey Tesalonica ino palunguwa turakki Pablo sikwara, ana kepayino ammera naawatan mapeafu sino puliyani Kristo, se nakungkul kepayino nakanda gafu sino sapitannino korwanira a nuliyen. Antuweno niturakkani Pablo sitawa mekadwa a tura'nga takesi mepakaammu sikwara si maunta a mappaddeno tolaya mangontara sino ammina lintiyi Dios anna umodduweno kinarakka'nenno tolayira, kasena muliyi Kristo.

Netungkappayi Pablo sikwara si natalanggaddira nadda mangurug anna mangwa si nalawad, massiki nu mapadyatanira gafu sinaya angngurudda. E sinutunnera kappay si ammera nad mattarut, nu ammera lud mallappatta mattarabafuwa kunna kappayino inangwara Pablo.

## Ino Bagga'na Yaw

Ino gafuneno turak *1:1-2*

Ino amma'gangnga i Dios so ammera mangurug naso puliyani Jesu *1:3-12*

Ino mangontara ki Dios *2:1-12*

Ino piniliyera i Dios a mesalakan *2:13-17*

Ino parangganda Pablo si mekararanira *3:1-5*

Ino sapi'da Pablo mapeafu sino matarutira *3:6-15*

Ino ambu'nenno turak *3:16-18*

---

## Ino Gafuneno Turak

**1** <sup>1</sup>Ikkamira Pablo, Silas, anni Timoteo. Antuyawino tura'mi sikwayuwa manguruwa makkakarampat sitan Tesalonica, ikkayuwa tolayi Dios a Amatam a nesapakkappay ki Afu Jesu Kristo.

<sup>2</sup>Allakkandakayu naddi Dios a Amatam anni Afu Jesu Kristo e passiyannakkanda naddino nakandaw.

### Ino Amma'gangnga I Dios So Ammera Mangurug Naso Puliyani Jesus

<sup>3</sup>Kakkolak, kanayungkami nadda mappasalamat ki Dios gafu sikwayu. Nalawara akwammī yaw, se mattuyaggino angnuruddaw, e dumokallino aggangandaw si kadda tata. <sup>4</sup>Antu gafuna, idayomikayu sino korwanira a mangurug ki Dios nu umangkami si korwana lubun. Itutuldumi sikwara si mattalaginaggayuwa mangurug, massiki madyatangkeyu gafu sino angnuruddaw.

<sup>5</sup>Antuyawino pimunuwan si naggaddangngeno pangukumani Dios, se gafu sino piyattammandaw sino kadyatandaw, damayuna a mesapat sino atturayanna, a antuweno gafuna a mallawungkeyu si dyat.

<sup>6</sup>Naggaddangngino akwani Dios a mangukum, se ino mappadyatira sikwayu, padyatannerana kappay, <sup>7</sup>anna pibattannaneno kinadidya'daw, kunna kappeneno akwanna sikwami. Akwannana yaw nanu muliyi Afu Jesus a maggabwat sey langita kebulunanino mannakadama a anghelnera,<sup>a</sup> <sup>8</sup>e ino baggina, malebaddanna si gumigillayafa afuy.

Kastigunnaneno tolayira a amme mangamma mangammu ki Dios, ira a ammena mangurug sino nalawara damag mappeafu ki Jesus a Afutam.

<sup>9</sup>Ino kastigura, madyatanirana si makkikiyad, mekatwayirana ki Afu Jesus, e ammerana maiteno kedayawanino pannakadamana. <sup>10</sup>Makwa ammin inay naso awa puliyani Afu Jesus. Mulina takesi dayawan amminino tolenera a mangurug sikwana anna iyatalda gafu sino inangwana. Mesapakkayu kappay sikwara se kinuruddawino sapiti Dios a netuldumi sikwayu.

<sup>11</sup>Antu gafuna, kanayummikayuwa ikararan takesi pabbalindakayuwi Dios si tolaya meannunga mesapat sikwana, se antuweno namiliyanna sikwayu. Gafu sino pannakadamana, duffunandakayu nad takesi meyakkurug amminino nalawara angandawa akwan anna mabalin amminino angandawa akwan gafu sino angnuruddaw. <sup>12</sup>Se nu kunnenoy, madayona i Jesus a Afutam gafu sino nalawara inangwayu, e madayokayuna kappay gafu se nesapakkayu sikwana. Makwana yaw gafu sino allakki Dios anni Afu Jesu Kristo.

### Ino Mangontara Ki Dios

**2** <sup>1</sup>Antuyawino sapitammi sikwayuwa kakkolak mappeafu so puliyanino Afutam a i Jesu Kristo annino pakkakarampattantamma a dumambal sikwana. <sup>2</sup>Ammena nad naladda a makungkulino nakandaw anna ammekayu nad maddararan gafu sino sapitanda a ana kanuweno nelabbummi onnu netuldumi onnu netura'mi a nada'ngennino

---

<sup>a</sup> 1:7 Ino tata kappaya angamma sapitan: ...kebulunanino anghelnera a kaitanino pannakadamana.

awa puliyani Afu Jesus. <sup>3</sup>Massiki sanneno sapitanda, ammeyu nad mabalabaliyana mangurug sinay. Se ammena dama a mada'ngenaya aw makkiyad si umoodduweno mangontara ki Dios, e mappadda kappayino tolaya mangontara sino ammina lintiyi Dios, a makastiguna sey infiyernu. <sup>4</sup>Kontarannana i Dios andino ammina dayawannino tolayira a ibilanda si diosdera, e iyantonaneno bagginangkepay sikwara ammin. E umangnga a mattuttud sino Templowi Dios, e kunnana si “Ikkanaki Dios.”

<sup>5</sup>Ammeyu kad madandammino netulduk sin nagyanangku sitan mapeafu sinay? <sup>6</sup>Ammuyu pay nu sanneno mifuwad sinaya tolaya mangontara sino ammina lintiyi Dios takesi ammena kepay mappadda kiyad si mada'ngeno awa piniliyi Dios si pappaddanna. <sup>7</sup>Massiki ammena kepay nappaddeno mangontara sino ammina lintiyi Dios, neyafunanino mamalabali sino tolayira takesi kontaranda kappayi Dios, udde neyimagepay, se aneno mifuwad sikwana. Nanu maariyeno mifuwad sikwana, mappaddenneno tolaya mangontara ki Dios. <sup>8</sup>Udde nanu muliyi Afu Jesus, ipaitananeno kinadiosna, e affutannana. Massiki nu idyofannana pelang, matayin.

<sup>9</sup>Nanu mappaddeno mangontara sino lintiyi Dios, ananeno pannakadamana a maggabwat ki Satanas. Kunnantu, odduneno kakka'bawa akwanna a mamalabali sino tolayira takesi maddayawira sikwana. <sup>10</sup>Nangangananneno narakkatta pamalabalina sino tolayira a mekatway ki Dios a makastigu. Inona gafuneno kakastiguwanda, ammera dingngaggan anna ammera kuruwannino kakuruwana tuldu mapeafu ki Jesus takesi mesalakanira nad. <sup>11</sup>Gafu se ammayandeno kakuruwana tuldu, purayanira i Dios takesi manguruwira si siri, <sup>12</sup>e kastigunnerana ammin gafu se ammera mangurug sino kakuruwan, nu ammera lud anggama a mangwa si narakkat.

### Ino Piniliyera I Dios A Mesalakan

<sup>13</sup>Udde ikkayuwa kakkolaka iiddukani Afu Jesus, kanayungkami nadda mappasalamat ki Dios gafu sikwayu. Se massiki sin awangkepay yo lubag, pinilirakayunna mesalakan, e nesalakangkayu gafu se kinuruddawino kakuruwana tuldu mapeafu ki Afu Jesus e nepabbalirakayuweno Espirituwi Dios si tolona a nadiosan. <sup>14</sup>Inayandakayuwi Dios a mesalakan gafu sino nalawara damaga netuldumi sikwayu takesi mesapakkayuna so kinadiosi Jesu Kristo a Afutam. <sup>15</sup>Kunnantu, kakkolak, mattalaginaggayu nad sino angnguruddaw. Aggadandammandonaddino netuldumi sino palunguwa tura'mi sikwayu annino netuldumi sin nagyanammi sitan.

<sup>16-17</sup>I Jesu Kristo a Afutam anni Dios a Amatam, pattuyagganda naddino nakandaw anna duffunandakayu nad takesi nalawad amminino akwandaw anna sapitandaw. Nepaita i Diosino aggangamma sikwatam,

e gafu sino alla'nga, ina'dandetam si natuyagga nakamma ammena mangkakwa annino nalawara innanamantam.

### Ino Parangganda Pablo Si Mekararanira

**3** <sup>1</sup>Ayokappay yo sapitammi sikwayu, kakkolak. Ikararaddakami abbu takesi malana mawwarakino sapiti Dios a ituldumi. Ikararaddokappay takesi maanggammino tolayira a maningngag anna mangurug sinaya tuldu a kunna pay sikwayu. <sup>2</sup>Arangngandokappay ki Dios ta ili'warakami sino narakkattira a tolay, se bakkanna ammina tolay e mangurug ki Dios.

<sup>3</sup>Udde massiki kunnenoy, matalakki Afu Jesus, e antuweno mappatuyag sikwayu anna mili'wa sikwayu sino narakkatta akwani Satanas. <sup>4</sup>Gafu kappay sikwana, innanamammi si itupa'dawa akwanino ammina sinapi'mi si akwandonad. <sup>5</sup>Ifuyu'na naddino nakandaw takesi madaggananino angngawa'daw sino aggidduki Dios sikwayu andino kinaattammi Kristo si dyat takesi tuntulandopay.

### Ino Sapi'da Pablo Mapeafu Sino Matarutira

<sup>6</sup>Kakkolak, ana kappayino sapitammi sikwayu gafu sino turaya neya'da i Afu Jesu Kristo sikwami. Ammekayu nad mebumbulun sino kakkolattamira a manguruwa matarut anna ammera tuntulannino netuldumi sikwayu. <sup>7</sup>Se ammuyun si tuntulandonaddino aggangwami sin nagyangkami sitan, se ammekami mataruta mattarabafu. <sup>8</sup>Awana inappami sikwayuwa ammeme pinagan, nu ammeme lud nattarabafu si aw anna gafi takesi ammekayu madyatan gafu sikwami. <sup>9</sup>Antuweno inangwami takesi ino tarabafumiyeno tuntulandaw, massiki aneno kalintiyammiya marang sino maawammi sikwayu. <sup>10</sup>Aggesapasapitammi sikwayu sin naganammi sitan si ammeyu nad pakkanannino matarutira a mattarabafu.

<sup>11</sup>Sapitammimman yaw sikwayu se nadamammi si ayan kanuweno matarutira sikwayuwa ammera mattarabafu. Awampelang akwanda, nu bakkannino lumala'lak sino akwanino bulundera. <sup>12</sup>Gafu sino turaya neya'da i Afu Jesu Kristo sikwami, sapitammi sikwara ta pittatanda naddino tarabafura ta wara pabbiyadda. <sup>13</sup>Udde ikkayuwa kakkolak, ammekayu nad matappagga mangwa si nalawad.

<sup>14</sup>Nu wara ammena mangurug sitawa tura'mi, palanandonad, e ammekayu mebulun sikwana, takesi maatallan. <sup>15</sup>Udde ammeyu ibilang si kalingayu, nu ammeyu lud tulduwan a kunnangke kola'daw.

### Ino Ambu'nenno Turak

<sup>16</sup>Kanayundakayu nadda a'dani Afu Jesus si nasiyanakka nakam, massiki sanneno makwa sikwayu, se antu pelangino paggabwatanino nasiyanakka nakam. Kanayungkappenadda mebumbulun sikwayu.

<sup>17</sup>Iyawa sapitangku sito ambu'na turakku, ikkanaki Pablo a nanurak sitaw. Antuyawino akwangku sino ammina turakku takesi maammuwan si gakkuruwa naggabwat sikwak, se maimunuwan sino annurakku.

<sup>18</sup>Allakkandakayu nad ammini Jesu Kristo a Afutam.